

四庫全書

史部

欽定四庫全書

史記正義卷五十

唐 張守節 撰

楚元王世家第二十

史記五十

楚元王劉交者

年表云
都彭城

高祖之同母少弟也字游高祖

兄弟四人長兄伯伯蚤卒始高祖微時嘗辟事時時與
客過巨嫂食嫂厭叔叔與客來嫂詳為羹盡櫟釜賓客
以故去已而視釜中尚有羹高祖由此怨其嫂及高祖

為帝封昆弟而伯子獨不得封太上皇以為言高祖曰
某非忘封之也為其母不長者耳於是乃封其子信為

羹頡侯

指地志云羹頡山在端州懷戎縣東南十五里按高祖取其山名為侯號者怨故也

而王

次兄仲於代高祖六年已禽楚王韓信於陳乃以弟交
為楚王都彭城即位二十三年卒子夷王郢立夷王四
年卒子王戊立王戊立二十年冬坐為薄太后服私姦
削東海郡春戊與吳王合謀反其相張尚太傅趙夷吾
諫不聽戊則殺尚夷吾起兵與吳西攻梁破棘壁

指地志云

大棘故城在宋州寧陵縣
西七十里州即梁棘壁

至昌邑南

括地志云有梁丘故城在曹州成武

縣東北三十二里也

與漢將周亞夫戰漢絕吳楚糧道士卒飢吳

王走楚王戊自殺軍遂降漢漢已平吳楚孝景帝欲以

德侯子續吳以元王子禮續楚竇太后曰吳王老人也

宜為宗室順善今乃首率七國紛亂天下奈何續其後

不許吳許立楚後是時禮為漢宗正乃拜禮為楚王奉

元王宗廟是為楚文王文王立三年卒子安王道立安

王二十二年卒子襄王經立襄王立十四年卒子王純

代立王純立地節二年中人上書告楚王謀反王自殺

國除入漢為彭城郡

漢書云王純嗣十六年子延壽嗣與趙何齊謀反延壽自殺立三十

二年國除與此不同地節是宣帝年號去天漢四年二十九年仍隔昭帝世言到地節二年以下者蓋褚先生誤

也

趙王劉遂者

年表云都邯鄲

其父高祖中子名友謚曰幽幽

王以憂死故為幽高后王呂祿於趙一歲而高后崩大

臣誅諸呂呂祿等乃立幽王子遂為趙王孝文帝即位

二年立遂弟辟彊取趙之河間郡為河間王

河間今瀛州北

為文王立十三年卒子哀王福立一年卒無子絕後國

除入于漢遂既王趙二十六年孝景帝時坐晁錯以適
削趙王常山之郡吳楚反趙王遂與合謀起兵其相建
德內史王悍諫不聽遂燒殺建德王悍發兵屯其西界
欲待吳與俱西北使匈奴與連和攻漢漢使曲周侯酈
寄擊之趙王遂還城守邯鄲相距七月吳楚敗於梁不
能西匈奴聞之亦止不肯入漢邊樂布自破齊還乃并
兵引水灌趙城趙城壞趙王自殺邯鄲遂降

邯鄲洛州縣也

趙

幽王絕後

太史公曰國之將興必有禎祥君子用而小人退國之
將亡賢人隱亂臣貴使楚王戊毋刑申公遵其言趙任
防與先生豈有篡殺之謀為天下僂哉賢人乎賢人乎
非質有其內惡能用之哉甚矣安危在出令存亡在所
任誠哉是言也

史記正義卷五十

欽定四庫全書

史記正義卷五十一

唐 張守節 撰

荆燕世家第二十一

史記五十一

荆王劉賈

年表云
都吳也

諸劉者不知其何屬初起時漢王元

年還定三秦劉賈為將軍定塞地從東擊項籍漢四年

漢王之敗成臯北渡河得張耳韓信軍軍脩武深溝高

壘使劉賈將二萬人騎數百渡白馬津入楚地

括地志
云黎陽

一名白馬津在滑州白馬縣北三十里按賈從此津南過入楚地也燒其積聚以破其業

無以給項王軍食而已楚兵擊劉賈賈輒壁不肯與戰

而與彭越相保漢五年漢王追遂籍至固陵

括地志云固陵陵名

在陳州宛邱縣西北四十二里

使劉賈南渡淮圍壽春

今壽州壽春縣是也

還至

使人間招楚大司馬周殷周殷反楚佐劉賈舉九江迎

漢王黥布兵皆會垓下共擊項籍漢王因使劉賈將九

江兵與大尉盧綰西南擊臨江王共尉共尉已死以臨

江為南郡

今荊州也

漢六年春會諸侯於陳

今陳州也

廢楚王信

因之分其地為二國當是時也高祖子幼昆弟少又不
賢欲王同姓以鎮天下乃詔曰將軍劉賈有功及擇子
弟可以為王者羣臣皆曰立劉賈為荊王王淮東五十二

城

括地志云西北四十里蓋此縣是也

高祖弟交為楚王王淮西三十六

城

淮以西徐州濠州也

因立子肥為齊王始王昆弟劉氏也高

祖十一年秋淮南王黥布反東擊荊荊王賈與戰不勝

走富陵

括地志云富陵故城在楚州盱眙縣東北六十里

為布軍所殺高祖自

擊破布十二年立沛侯劉濞為吳王王故荆地

燕王劉澤者諸劉遠屬也高帝三年澤為郎中高帝十

一年澤以將軍擊陳豨得王黃為營陵侯

括地志云營陵故城在青

州北海縣南三十里

高后時齊人田生游之資以畫干營陵侯澤

澤大說之用金二百斤為田生壽田生已得金即歸齊

二年澤使人謂田生曰弗與矣田生如長安不見澤而

假大宅令其子求事吕后所幸大謁者張子卿居數月

田生子請張卿臨親脩具張卿許往田生盛帷帳共具

譬如列侯張卿驚酒酣乃屏人說張卿曰臣觀諸侯王

邸第百餘皆高祖一切功臣今呂氏雅故本推轂高帝就天下功至大又親戚太后之重太后春秋長諸呂弱太后欲立呂產為呂王王代太后又重發之恐大臣不聽今卿最幸大臣所敬何不風大臣以聞太后太后必喜諸呂已王萬戶侯亦卿之有

高后紀云封張卿為建陵侯


太后心

欲之而卿為內臣不急發恐禍及身矣張卿大然之乃風大臣語太后太后朝因問大臣大臣請立呂產為呂王太后賜張卿千斤金張卿以其半與田生田生弗受

因說之曰呂產王也諸大臣未大服今營陵侯澤諸劉
為大將軍獨此尚缺望今卿言太后列十餘縣王之彼
得王喜去諸呂王益固矣張卿入言太后然之乃以營
陵侯劉澤為琅邪王琅邪王乃與田生之國田生勸澤
急行毋留出關太后果使人追止之已出即還及太后
崩琅邪王澤乃曰帝少諸呂用事劉氏孤弱乃引兵與
齊王合謀西欲誅諸呂至梁聞漢遣灌將軍屯滎陽澤
還兵備西界遂跳驅至長安代王亦從代至諸將相與

琅邪王共立代王為天子天子乃徙澤為燕王乃復以
琅邪予齊復故地澤王燕二年薨謚為敬王傳子嘉為
康王至孫定國與父康王姬姁生子男一人奪弟妻為
姬與子女三人姁定國有所欲誅殺臣肥如令郢人郢
人等告定國定國使謁者以他法劾捕格殺郢人以滅
口至元朔元年郢人昆弟復上書具言定國陰事以此
發覺詔下公卿皆議曰定國禽獸行亂人倫逆天當誅
上許之定國自殺國除為郡

太史公曰荆王王也由漢初定天下未集故劉賈雖屬
疎然以策為王填江淮之閒劉澤之王權激呂氏然劉
澤卒南面稱孤者三世事發相重豈不為偉乎



史記正義卷五十一

欽定四庫全書

史部

史記正義卷五十二至五十九

詳校官編修臣李如筠

欽定四庫全書

史記正義卷五十二

唐 張守節 撰

齊悼惠王世家第二十二

史記五十二

齊悼惠王

年表云
都臨淄

劉肥者高祖長庶男也其母外婦也

曰曹氏高祖六年立肥為齊王食七十城諸民能齊言

者皆予齊王齊王孝惠帝兄也孝惠帝二年齊王入朝

惠帝與齊王燕飲亢禮如家人呂太后怒且誅齊王齊

王懼不得脫乃用其內史勲計獻城陽郡

括地志云濮州雷澤縣本

漢城陽縣按後為郡也

以為魯元公主湯沐邑呂太后喜乃得辭

就國悼惠王即位十三年以惠帝六年卒子襄立是為

哀王哀王元年孝惠帝崩呂太后稱制天下事皆決於

高后二年高后立其兄子酈侯

按音呈益反括地志云故酈城在鄆州新城縣

西北四十里蓋此縣是也

呂台為呂王割齊之濟南郡

括地志云濟南故城在淄

州長山縣西北三十五里

為呂王奉邑哀王三年其弟章入宿衛於

漢呂太后封為朱虛侯以呂祿女妻之後四年封章弟

興居為東牟侯皆宿衛長安中哀王八年高后割齊琅

邪郡

今沂州也

立營陵侯劉澤為琅邪王其明年趙王友入

朝幽死于邸三趙王皆廢高后立諸呂為三王擅權用

事朱虛侯年二十有氣力怱劉氏不得職嘗入侍高后

燕飲高后令朱虛侯劉章為酒吏章自請曰臣將種也

請得以軍法行酒高后曰可酒酣章進飲歌舞已而曰

請為太后言耕田歌高后兒子畜之笑曰顧而父知田

耳若生而為王子安知田乎章曰臣知之太后曰試為

我言田章曰深耕穡種立苗欲䟽非其種者鋤而去之
呂后默然頃之諸呂有一人醉亡酒章追拔劒斬之而
還報曰有亡酒一人臣謹行法斬之太后左右皆大驚
業已許其軍法無以罪也因罷自是之後諸呂憚朱虛
侯雖大臣皆依朱虛侯劉氏為益彊其明年高后崩趙
王呂祿為上將軍呂王產為相國皆居長安中聚兵以
威大臣欲為亂朱虛侯章以呂祿女為婦知其謀乃使
人陰出告其兄齊王欲令發兵西朱虛侯東牟侯為內

應以誅諸呂因立齊王為帝齊王既聞此計乃與其舅
父駟鈞郎中令祝午中尉魏勃陰謀發兵齊相召平聞
之乃發卒衛王宮魏勃給召平曰王欲發兵非有漢虎
符驗也而相君圍王固善勃請為君將兵衛衛王召平
信之乃使魏勃將兵圍王宮勃既將兵使圍相府召平
曰嗟乎道家之言當斷不斷反受其亂乃是也遂自殺
於是齊王以駟鈞為相魏勃為將軍祝午為內史悉發
國中兵使祝午東詐琅邪王曰呂氏作亂齊王發兵欲

西誅之齊王自以兒子年少不習兵革之事願舉國委
大王大王自高帝將也習戰事齊王不敢離兵使臣請
大王幸之臨菑見齊王計事并將齊兵以西平關中之
亂琅邪王信之以為然西馳見齊王齊王與魏勃等因
留琅邪王而使祝午盡發琅邪國而并將其兵琅邪王
劉澤既見欺不得反國乃說齊王曰齊悼惠王高皇帝
長子推本言之而大王高皇帝適長孫也當立今諸大
臣狐疑未有所定而澤於劉氏最為長年大臣固待澤

決計今大王留臣無為也不如使我入關計事齊王以
為然乃益具車送琅邪王琅邪王既行齊遂舉兵西攻
呂國之齊南於是齊哀王遺諸侯王書曰高帝平定天
下王諸子弟悼惠王於齊悼惠王薨惠帝使留侯張良
立臣為齊王惠帝崩高后用事春秋高聽諸呂擅廢高
帝所立又殺三趙王

隱王如意幽王友梁王
恢徙燕趙並高祖子也

滅梁燕趙

梁王恢燕王建梁王
恢徙趙分滅無後也

以王諸呂分齊國為四

琅邪郡封
劉澤濟南

郡以為呂王奉邑城陽
為魯元公主湯沐邑也

忠臣進諫上惑亂不聽今高后

崩皇帝春秋富未能治天下固恃大臣諸將今諸呂又擅自尊官聚兵嚴威劫列侯忠臣矯制以今天下宗廟所以危今寡人率兵入誅不當為王者漢聞齊發兵而西相國呂產乃遣大將軍灌嬰東擊之灌嬰至滎陽乃謀曰諸呂將兵居關中欲危劉氏而自立我今破齊還報是益呂氏資也乃留兵屯滎陽使使喻齊王及諸侯與連和以待呂氏之變而共誅之齊王聞之乃西取其故濟南郡亦屯兵於齊西界以待約呂祿呂產欲作亂

關中朱虛侯與太尉勃丞相平等誅之朱虛侯首先斬
呂產於是太尉勃等乃得盡誅諸呂而琅邪王亦從齊
至長安大臣議欲立齊王而琅邪王及大臣曰齊王母
家駟鈞惡戾虎而冠者也方以呂氏故幾亂天下今又
立齊王是欲復為呂氏也代王母家薄氏君子長者且
代王又親高帝子於今見在且最為長以子則順以善
人則大臣安於是大臣乃謀迎立代王而遣朱虛侯以
誅呂氏事告齊王令罷兵灌嬰在滎陽聞魏勃本教齊

王反既誅呂氏罷齊兵使使召責問魏勃勃曰失火之家豈暇先言大人而後救火乎因退立股戰而栗恐不能言者終無他語灌將軍熟視笑曰人謂魏勃勇妄庸人耳何能為乎乃罷魏勃魏勃父以善鼓琴見秦皇帝及魏勃少時欲求見齊相曹參家貧無以自通乃常獨早夜掃齊相舍人門外相舍人怪之以為物而伺之得勃勃曰願見相君無因故為子掃欲以求見於是舍人見勃曹參因以為舍人一為參御言事參以為賢言之

齊悼惠王悼惠王召見則拜為內史始悼惠王得自置
二千石及悼惠王卒而哀王立勃用事重於齊相王既
罷兵歸而代王來立是為孝文帝孝文帝元年盡以高
后時所割齊之城陽琅邪濟南郡復與齊而徙琅邪王
王燕益封朱虛侯東牟侯各二千戶是歲齊哀王卒太
子側立是為文王齊文王元年漢以齊之城陽郡立朱
虛侯為城陽王以齊濟北郡今濟州濟北王所都立東牟侯為濟
北王二年濟北王反漢誅殺之地入于漢後二年孝文

帝盡封齊悼惠王子罷軍等七人

罷音不

皆為列侯齊文

王立十四年卒無子國除地入于漢後一歲孝文帝以
所封悼惠王子分齊為王齊孝王將閭以悼惠王子楊
虛侯為齊王故齊別郡盡以王悼惠王子子志為濟北
王子辟光為濟南王子賢為菑川王子卬為膠西王子
雄渠為膠東王與城陽齊凡七王齊孝王十一年吳王
濞楚王戊反興兵西告諸侯曰將誅漢賊臣鼂錯以安
宗廟膠西膠東菑川濟南皆擅發兵應吳楚欲與齊齊

孝王狐疑城守不聽三國兵共圍齊齊王使路中大夫
告於天子天子復令路中大夫還告齊王善堅守吾兵
今破吳楚矣路中大夫至三國兵圍臨菑數重無從入
三國將劫與路中大夫盟曰若反言漢已破矣齊趣下
三國不且見屠路中大夫既許之至城下望見齊王曰
漢已發兵百萬使太尉周亞夫擊破吳楚方引兵救齊
齊必堅守無下三國將誅路中大夫齊初圍急陰與三
國通謀約未定會聞路中大夫從漢來喜及其大臣乃

復勸王毋下三國居無何漢將爰布平陽侯等兵至齊擊破三國兵解齊圍已而復聞齊初與三國有謀將欲移兵伐齊齊孝王懼乃飲藥自殺景帝聞之以為齊首善以迫劫有謀非其罪也乃立孝王太子壽為齊王是為懿王續齊後而膠西膠東濟南菑川王咸誅滅地入于漢徙濟北王王菑川齊懿王立二十二年卒子次景立是為厲王齊厲王其母曰紀太后太后取其弟紀氏女為厲王后王不愛紀氏女太后欲其家重寵令其長

女紀翁主入王宮正其後宮母令得近王欲令愛紀氏
女王因與其姊翁主奸齊有宦者徐甲入事漢皇太后
皇太后有愛女曰脩成君脩成君非劉氏太后憐之脩
成君有女名娥太后欲嫁之於諸侯宦者甲乃請使齊
必令王上書請娥皇太后喜使甲之齊是時齊人主父
偃知甲之使齊以取后事亦因謂甲即事成幸言偃女
願得充王後宮甲既至齊風以此事紀太后大怒曰王
有后後宮具備且甲齊貧人急乃為宦者入事漢無補

益乃欲亂吾王家且主父偃何為者乃欲以女充後宮
徐甲大窮還報皇太后曰王已願尚娥然有一害恐如
燕王燕王者與其子昆弟姦新坐以死亡國故以燕感
太后太后曰無復言嫁女齊事事浸濶不得聞於天子
主父偃由此亦與齊有卻主父偃方幸於天子用事因
言齊臨菑十萬戶市租千金人衆殷富巨於長安此非
天子親弟愛子不得王此今齊王於親屬益疎乃從容
言呂太后時齊欲反吳楚時孝王幾為亂今聞齊王與

其姊亂於是天子乃拜主父偃為齊相且正其事主父
偃既至齊乃急治王後宮宦者為王通於姊翁主所者
令其辭證皆引王王年少懼大罪為吏所執誅乃飲藥
自殺絕無後是時趙王懼主父偃一出廢齊恐其漸踈
骨肉乃上書言偃受金及輕重之短天子亦既囚偃公
孫弘言齊王以憂死母後國入漢非誅偃無以塞天下
之望遂誅偃齊厲王立五年死母後國入于漢齊悼惠
王後尚有二國城陽及菑川菑川地比齊天子憐齊為

悼惠王冢園在郡割臨菑東環悼惠王冢園邑盡以予

菑川以奉悼惠王祭祀城陽景王章

年表云部菑也

齊悼惠王

子以朱虛侯與大臣共誅諸呂而章身首先斬相國呂

王產於未央宮孝文帝既立益封章二千戶賜金千斤

孝文二年以齊之城陽郡立章為城陽王立二年卒子

喜立是為共王共王八年徙王淮南

年表云部陳也

四年復還

王城陽凡三十三年卒子建延立是為頃王頃王二十

八年卒子義立是為敬王敬王九年卒子武立是為惠

王惠王十一年卒子順立是為荒王荒王四十六年卒

子恢立是為戴王戴王八年卒子景立至建始三年

建始

成帝年號從建始四年上至天漢四年六十七矣蓋諸先生次之

十五歲卒濟北王興

居

都濟州也

齊悼惠王子以東牟侯助大臣誅諸呂功少及

文帝從代來興居曰請與太僕嬰入清宮廢少帝共與

大臣尊立孝文帝孝文帝二年以齊之濟北郡立興居

為濟北王與城陽王俱立立二年反始大臣誅呂氏時

朱虛侯功尤大許盡以趙地王朱虛侯盡以梁地王東

牟侯及孝文帝立聞朱虛東牟之初欲立齊王故絀其
功及二年王諸子乃割齊二郡以王章興居章興居自
以失職奪功章死而興居聞匈奴大入漢漢多發兵使丞相灌
嬰擊之文帝親幸太原以為天子自擊胡遂發兵反於
濟北天子聞之罷丞相及行兵皆歸長安使棘蒲侯柴
將軍擊破虜濟北王王自殺地入于漢為郡後十二年
文帝十六年復以齊悼惠王子安都侯
安都故城在瀛州高陽縣西南
三十志為濟北王十一年吳楚反時志堅守不與諸侯
九里

合謀吳楚已平徙志王菑川濟南王辟光

辟音璧都
濟南郡

齊

悼惠王子以勒侯孝文十六年為濟南王十一年與吳

楚反漢擊破殺辟光以濟南為郡地入于漢菑川王賢

年表云淄川王都劇故城在

青州壽光縣西三十一里

齊悼惠王子以武城侯

貝州

縣

文帝十六年為菑川王十一年與吳楚反漢擊破殺

賢天子因徙濟北王志王菑川志以齊悼惠王子以安

都侯王濟北菑川王反母後乃徙濟北王王菑川凡立

三十五年卒謚為懿王子建代立是為靖王二十年卒

子遺代立是為頃王三十六年卒子終古立是為思王

二十八年卒子尚立是為孝王五年卒子橫立至建始

亦褚少

三年十一歲卒膠西王卬

卬五郎反年表云都高苑

孫次之

故城在淄州長

川縣北四里

齊悼惠王子以昌平侯

括地志云西苑故城在幽州東

南六十里也

文帝十六年為膠西王十一年與吳楚反漢擊

破殺卬地入于漢為膠西郡膠東王雄渠

年表云都高墨按即墨故

城在萊州膠東

齊悼惠王子以白石侯

白石古城在德州安德縣北二

縣南六十里

十 文帝十六年為膠東王十一年與吳楚反漢擊破殺

雄渠地入于漢為膠東郡

太史公曰諸侯大國無過齊悼惠王以海內初定子弟少激秦之無尺土封故大封同姓以填萬民之心及後分裂固其理也

史記正義卷五十二

欽定四庫全書

史記正義卷五十三

唐 張守節 撰

蕭相國世家第二十三

史記五十三

蕭相國何者沛豐人也以文無害為沛主吏掾高祖為布衣時何數以吏事護高祖高祖為亭長常左右之高祖以吏繇咸陽吏皆送奉錢三何獨以五秦御史監郡者與從事常辨之何乃給泗水卒史事第一秦御史欲

入言徵何何固請得毋行及高祖起為沛公何常為丞
督事沛公至咸陽諸將皆爭走金帛財物之府分之何
獨先入收秦丞相御史律令圖書藏之沛公為漢王以
何為丞相項王與諸侯屠燒咸陽而去漢王所以具知
天下阨塞戶口多少彊弱之處民所疾苦者以何具得
秦圖書也何進言韓信漢王以信為大將軍語在淮陰
侯事中漢王引兵東定三秦何以丞相留收巴蜀填撫
諭告使給軍食漢二年漢王與諸侯擊楚何守關中侍

太子治櫟陽為法令約束立宗廟社稷宮室縣邑輒奏
上可許以從事即不及奏上輒以便宜施行上來以聞
關中事計戶口轉漕給軍漢王數失軍遁去何常興關
中卒輒補缺上以此專屬任何關中事漢三年漢王與
項羽相距京索之間上數使使勞苦丞相鮑生謂丞相
曰王暴衣露蓋數使使勞苦君者有疑君心也為君計
莫若遣君子孫昆弟能勝兵者悉詣軍所上必益信君
於是何從其計漢王大說漢五年既殺項羽定天下論

功行封羣臣爭功歲餘功不決高祖以蕭何功最盛封
為鄼侯所食邑多功臣皆曰臣等身被堅執銳多者百
餘戰少者數十合攻城略地大小各有差今蕭何未嘗
有汗馬之勞徒持文墨議論不戰顧反居臣等上何也
高帝曰諸君知獵乎曰知之知獵狗乎曰知之高帝曰
夫獵追殺獸兔者狗也而發蹤指示獸處者人也今諸
君徒能得走獸耳功狗也至如蕭何發蹤指示功人也
且諸君獨以身隨我多者而三人今蕭何舉宗數十人

皆隨我功不可忘也羣臣皆莫敢言列侯畢已受封及
奏位次皆曰平陽侯曹參身被七十創攻城略地功最
多宜第一上已撓功臣多封蕭何至位次未有以復難
之然心欲何第一關內侯鄂君進曰羣臣議皆誤夫曹
參雖有野戰略地之功此特一時之事夫上與楚相距
五歲常失軍亡衆逃身遁者數矣然蕭何常從關中遣
軍補其處非上所詔令召而數萬衆會上之乏絕者數
矣夫漢與楚相守滎陽數年軍無見糧蕭何轉漕關中

給食不乏陛下雖數亡山東蕭何常全關中以待陛下
此萬世之功也今雖亡曹參等百數何缺於漢漢得之
不必待以全奈何欲以一旦之功而加萬世之功哉蕭
何第一曹參次之高祖曰善於是乃令蕭何賜帶劔履
上殿入朝不趨上曰吾聞進賢受上賞蕭何功雖高得
鄂君乃益明於是因鄂君故所食關內侯邑封為安平
侯

括地志云澤州安平縣本漢安平縣

是日悉封何父子兄弟十餘人皆

有食邑乃益封何二千戶以帝嘗繇咸陽時何送我獨

嬴奉錢二也漢十一年陳豨反高祖自將至邯鄲未罷
淮陰侯謀反關中呂后用蕭何計誅淮陰侯語在淮陰
事中上已聞淮陰侯誅使使拜丞相何為相國益封五
千戶令卒五百人一都尉為相國衛諸軍皆賀召平獨
弔召平者故秦東陵侯秦破為布衣貧種瓜於長安城
東瓜美故世俗謂之東陵瓜從召平以為名也召平謂
相國曰禍自此始矣上暴露於外而君守於中非被矢
石之事而益君封置衛者以今者淮陰侯新反於中疑

君心矣夫置衛衛君非以寵君也願君讓封勿受悉以
家私財佐軍則上心說相國從其計高帝乃大喜漢十
二年秋黥布反上自將擊之數使使問相國何為相國
為上在軍乃拊循勉力百姓悉以所有佐軍如陳稀時
客有說相國曰君滅族不久矣夫君位為相國功第一
可復加哉然君初入關中得百姓心十餘年矣皆附君
常復孳孳得民和上所為數問君者畏君傾動關中今
君胡不多買田地賤貰貸

貰音世又食夜反
賒也下天得反

以自汙上

心乃安於是相國從其計上乃大說上罷布軍歸民道
遮行上書言相國賤彊買民田宅數千萬上至相國謁
上笑曰夫相國乃利民民所上書皆以與相國曰君自
謝民相國因為民請曰長安地狹上林中多空地棄願
令民得入田毋收橐為禽獸食上大怒曰相國多受賈
人財物乃為請吾苑乃下相國廷尉械繫之數日王衛
尉侍前問曰相國何大罪陛下繫之暴也上曰吾聞李
斯相秦皇帝有善歸主有惡自與今相國多受賈豎金

而為民請吾苑以自媚於民故繫治之王衛尉曰夫職事苟有便於民而請之真宰相事陛下奈何乃疑相國受賈人錢乎且陛下距楚數歲陳豨黥布反陛下自將而往當是時相國守關中搖足則關以西非陛下有也相國不以此時為利今乃利賈人之金乎且秦以不聞其過亡天下李斯之分過又何足法哉陛下何疑宰相之淺也高帝不憚是日使使持節赦出相國相國年老素恭謹入徒跣謝高帝曰相國休矣相國為民請苑吾

不許我不過為桀紂主而相國為賢相吾故繫相國欲
令百姓聞吾過也何素不與曹參相能及何病孝惠自
臨視相國病因問曰君即百歲後誰可代君者對曰知
臣莫如主孝惠曰曹參何如何頓首曰帝得之矣臣死
不恨矣何置田宅必居窮處為家不治垣屋曰後世賢
師吾儉不賢毋為勢家所奪孝惠二年相國何卒

括地志云

蕭何墓在雍州咸陽縣東北三十七里

謚為文終侯後嗣以罪失侯者四

世絕天子輒復求何後封續鄼侯功臣莫得比焉

太史公曰蕭相國何於秦時為刀筆吏錄錄未有奇節
及漢興依日月之末光何謹守管籥因民之疾奉法順
流與之更始淮陰黥布等皆以誅滅而何之勲爛焉位
冠羣臣聲施後世與閔天散宜生等爭烈矣

史記正義卷五十三

欽定四庫全書

史記正義卷五十四

唐 張守節 撰

曹參世家第二十四

史記五十四

平陽侯

晉州城即平陽故城也

曹參者沛人也

按沛今徐州縣也

秦時為

沛獄掾而蕭何為主吏居縣為豪吏矣高祖為沛公而

初起也參以中涓從將擊胡陵

縣名在方與南

方與

方音房與音預兗州

縣也

攻秦監公軍大破之東下薛擊泗水守軍薛郭西復

攻胡陵取之徙守方與方與反為魏擊之

曹參擊方與

豐反

為魏攻之賜爵七大夫擊秦司馬居

音夷

軍碭東破之取

碭狐父

括地志云狐父亭在宋州碭山縣東南三十里

祁善置

括地志云故祁城在宋州下邑

縣東北四十九里漢祁城縣也言取碭狐父及祁縣之善置

又攻下邑以西至虞

宋州

下邑縣在州東百一十里漢下邑城今碭山縣是虞城縣在州北五十里古虞國商均所封

擊章邯

車騎攻爰戚

音寂劉音七歷反今在兗州南近亢父縣

及亢父

括地志云亢父故城在兗

州任城縣南五十一里

先登遷為五大夫北救東阿

今濟州東阿也

擊章

邯軍臨陳追至濮陽攻定陶取臨濟

淄州高苑縣西北二里北狄故城安

縣改曰臨濟

南救雍邱擊李由軍破之殺李由虜秦侯一人

秦將章邯破殺項梁也沛公與項羽引而東楚懷王以

沛公為碭郡長將碭郡兵於是乃封參為執帛號曰建

成君遷為戚公

即爰戚縣也是時屬沛郡

屬碭郡其後從攻東郡尉

軍破之成武南擊王離軍成陽南

成陽故城濮州雷澤縣是史記云武王封

弟季載於成其後遷於成之陽故曰成陽也

復攻之杠里大破之追北西至

開封擊趙賁軍破之圍趙賁開封城中西擊秦將楊熊

軍於曲遇

曲正羽反遇牛恭反司馬彪郡國志云中牟有曲遇聚按中牟鄭州縣也

破之虜

秦司馬及御史各一人遷為執珪從攻陽武

括地志云陽武故城

在鄭州陽武縣東北十八里漢陽武縣城也

下轅轅緱氏

緱氏洛州縣也括地志云環轅故關

在洛州緱氏縣東南四十里十三州志云環轅道凡十二曲是險道

絕河津

津濟渡處括地志云平陰

故津在洛州洛陽縣東北五十里

還擊趙賁軍尸北破之

破趙賁軍於尸鄉之北也

括地志云尸鄉亭在洛州偃師縣在洛州東南也

從南攻犍與南陽守齟戰陽

城郭東臨陳

臨南陽守於陽城郭東也

取宛虜齟盡定南陽郡從西

攻武關峽關

括地志云故武關在商州商洛縣東九十里藍田關在雍州藍田縣東南九十里即

秦峽關也

取之前攻秦軍藍田南

雍州藍田縣在州東南八十里因藍田山為名

又

夜擊其北秦軍大破遂至咸陽滅秦項羽至以沛公為

漢王漢王封參為建成侯從至漢中

梁州本漢中郡

遷為將軍

從還定三秦初攻下辯故道

括地志云成州同谷縣本漢下辯道又云鳳州兩當

縣本漢故道縣

雍棧

棧作棧音貼括地志云故雍縣南七里故棧城一名武功縣西南二

在州西五十里十二里古

擊章平軍於好畤南

括地志云好畤城在雍州好畤縣東南十三里

破之圍好畤取壤鄉擊三秦軍壤東及高櫟

音歷皆村邑名壤鄉

今在雍州武功縣東南二十餘里高櫟坊是高櫟近壤鄉也

破之復圍章平章平出

好畤走因擊趙賁內史保軍破之東取咸陽更命曰新

城參將兵守景陵二十日三秦使章平等攻參參出擊

大破之賜食邑於寧秦參以將軍引兵圍章邯於廢

周曰犬丘秦更名廢丘漢更名魏里
今故城在雍州始平縣東南十里
以中尉從漢王出

臨晉關

即蒲津關也在臨晉縣故言臨晉關今在同州也

至河內下脩武

今懷州獲

嘉縣古

渡圍津

括地志云黎陽津一名白馬津在滑州白馬縣北三十里帝王世紀云白馬縣

脩武也

南有韋城故秦韋國也續漢書郡國志云白馬縣有韋城

東擊龍且項他定陶破之

東取碭蕭彭城

徐州二縣

擊項籍軍漢軍大敗走參以中尉

圍取雍王王武反於黃程處反於燕往擊盡破之柱天

侯反於衍氏又進破取衍氏擊羽嬰於昆陽追至葉還

攻武彊

括地志云武彊故城在鄭州管城縣東北三十一里

因至滎陽參目漢中

為將軍中尉從擊諸侯及項羽敗還至滎陽凡二歲高

祖三年拜為假左丞相入屯兵關中月餘魏王豹反以

假左丞相別與韓信東攻魏將軍孫遨軍東張

括地志云張陽

故城一名東張城在蒲州虞鄉縣西北四十里

大破之因攻安邑得魏將王襄

擊魏王於曲陽

括地志云上曲陽定州恒陽縣是下曲陽在定州鼓城縣西五里

追至

武垣

括地志云武垣縣今瀛州城是地理志云武垣縣屬涿郡也

生得魏王豹取平陽

晉州城是

得魏王母妻子盡定魏地凡五十二城賜食邑平

陽因從韓信擊趙相國夏說軍於鄆東大破之斬夏說

韓信與故常山王張耳引兵下井陘擊成安君而令參

還圍趙別將戚將軍於鄆城中戚將軍出走追斬之乃

引兵詣敖倉漢王之所韓信已破趙為相國東擊齊參

以右丞相屬韓信攻破齊歷下軍遂取臨菑還定濟北

郡攻著潞陰平原鬲盧

括地志云平原故城在德州平原縣東南十里故鬲城在德州

安德縣西北十五里盧

縣今濟州理縣是也

已而從韓信擊龍且軍於上假

密大破之斬龍且虜其將軍周蘭定齊凡得七十餘縣
得故齊王田廣相田光其守相許章及故齊膠東將軍
田既韓信為齊王引兵詣陳與漢王共破項羽而參留
平齊未服者項籍已死天下定漢王為皇帝韓信徙為
楚王齊為郡參歸漢相印高帝以長子肥為齊王而以
參為齊相國以高祖六年賜爵列侯與諸侯剖符世世
勿絕食邑平陽萬六百三十戶號曰平陽侯除前所食
邑以齊相國擊陳豨將張春軍破之黥布反參以齊相

國從悼惠王將兵車騎十二萬人與高祖會擊燕布軍

大破之南至蘄還定竹邑相蕭留

括地志云徐州扶離縣城漢竹邑城也李

奇云今竹邑也故相城在符離縣西北九十里輿地志云宋共公自睢陽徙相子城又還睢陽蕭徐州縣也古

蕭叔國城也故留城在徐州參功凡下二國縣一百二

十二得王二人相三人將軍六人大莫敖郡守司馬候

御史各一人孝惠帝元年除諸侯相國法更以參為齊

丞相參之相齊齊七十城天下初定悼惠王富於春秋

參盡召長老諸生問所以安集百姓如齊故俗諸儒以

百數言人人殊參未知所定聞膠西有蓋公善治黃老
言使人厚幣請之既見蓋公蓋公為言治道貴清靜而
民自定推此類具言之參於是避正堂舍蓋公焉其治
要用黃老術故相齊九年齊國安集大稱賢相惠帝二
年蕭何卒參聞之告舍人趣治行吾將入相居無何使
者果召參參去屬其後相曰以齊獄市為寄慎勿擾也
後相曰治無大於此者乎參曰不然夫獄市者所以并
容也今君擾之姦人安所容也吾是以先之參始微時

與蕭何善及為將相有郤至何且死所推賢唯參參代何為漢相國舉事無所變更一遵蕭何約束擇郡國吏木訥於文辭重厚長者即召除為丞相史吏之言文刻深欲務聲名者輒斥去之日夜飲醇酒卿大夫以下吏及賓客見參不事事來者皆欲有言至者參輒飲以醇酒間之欲有所言復飲之醉而後去終莫得開說以為常相舍後園近吏舍吏舍日飲歌呼從吏惡之無如之何乃請參游園中聞吏醉歌呼從吏幸相國召按之乃

反取酒張坐飲亦歌呼與相應和參見人之有細過專掩匿覆蓋之府中無事參子窰為中大夫惠帝怪相國不治事以為豈少朕與乃謂窰曰若歸試私從容問而父曰高帝新棄羣臣帝富於春秋君為相日飲無所請事何以憂天下乎然無言吾告若也窰既洗沐歸間侍自從其所諫參參怒而答窰二百曰趣入侍天下事非若所當言也至朝時惠帝讓參曰與窰胡治乎乃者我使諫君也參免冠謝曰陛下自察聖武孰與高帝上曰

朕乃安敢望先帝乎曰陛下觀臣能孰與蕭何賢上曰君似不及也參曰陛下言之是也且高帝與蕭何定天下法令既明今陛下垂拱參等守職遵而勿失不亦可乎惠帝曰善君休矣參為漢相國出入三年卒謚懿侯子窋代侯百姓歌之曰蕭何為法顙若畫一曹參代之守而勿失載其清淨民以寧一平陽侯窋高后時為御史大夫孝文帝立免為侯立二十九年卒謚為靜侯子竒代侯立七年卒謚為簡侯子時代侯時尚平陽公主生

子襄時病癘歸國立二十三年卒謚夷侯子襄代侯襄
尚衛長公主生子宗立十六年卒謚為共侯子宗代侯
征和二年中宗坐太子死國除

太史公曰曹相國參攻城野戰之功所以能多若此者
以與淮陰侯俱及信已滅而列侯成功唯獨參擅其名
參為漢相國清靜極言合道然百姓離秦之酷後參與
休息無為故天下俱稱其美矣

史記正義卷五十四

欽定四庫全書

史記正義卷五十五

唐 張守節 撰

留侯世家第二十五

史記五十五

留侯

括地志云故留城在徐州沛縣東南五十五里今城內有張良廟也

張良者其先

韓人也

括地志云城父在汝州郊縣東三十里韓里也

大父開地相韓昭侯宣

惠王襄哀王父平相釐王悼惠王悼惠王二十三年平

卒卒二十歲秦滅韓良年少未宦事韓韓破良家僮三

百人第死不葬悉以家財求客刺秦王為韓報仇以大

父父五世相韓故良嘗學禮淮陽

今陳州也

東見倉海君

漢書

武帝紀云元年東夷穢君南閭等降為倉海郡今緬穢國得之太史公修史時已降為郡自書之括地志云穢

緬在高麗南新羅北東至大海西

得力士為鐵椎重百二十斤秦皇帝

東游良與客狙擊秦皇帝博浪沙中

晉地理記云鄭州陽武縣有博浪沙

按今當官道也

誤中副車秦皇帝大怒大索天下求賊甚急為

張良故也良乃更姓名亡匿下邳良嘗閒從容步游下

邳圯上有一老父衣褐至良所直墮其履圯下顧謂良

曰孺子下取履良愕然欲歐之為其老彊忍下取履父
曰履我良業為取履因長跪履之父以足受笞而去良
殊大驚隨目之父去里所復還曰孺子可教矣後五日
平明與我會此良因怪之跪曰諾五日平明良往父已
先在怒曰與老人期後何也去曰後五日早會五日鷄
鳴良往父又先在復怒曰後何也去曰後五日復早來
五日良夜未半往有頃父亦來喜曰當如是出一編書
曰讀此則為王者師矣後十年興十三年孺子見我濟

北穀城山下黃石即我矣

括地志云穀城山一名黃山在濟州東河縣東濟州故濟

北郡孔文祥云黃石公鬚眉皆白狀杖冊黎復赤烏

遂去無他言不復見旦日視

其書乃太公兵法也

七錄云太公兵法一秩三卷太公姜子牙周文王師封齊侯也

良

因異之常習誦讀之居下邳為任俠項伯嘗殺人從良
匿後十年陳涉等起兵良亦聚少年百餘人景駒自立
為楚假王在留良欲往從之道遇沛公將數千人略地
下邳西遂屬焉沛公拜良為廐將良數以太公兵法說
沛公沛公善之常用其策良為他人言皆不省良曰沛

公殆天授故遂從之不去見景駒及沛公之薛見項梁
項梁立楚懷王良乃說項梁曰君已立楚後而韓諸公子
橫陽君成賢可立為王益樹黨項梁使良求韓成立以
為韓王以良為韓申徒與韓王將千餘人西略韓地得
數城秦輒復取之往來為游兵潁川沛公之從雒陽南出
轍轅良引兵從沛公下韓十餘城擊破楊熊軍沛公乃
令韓王成留守陽翟與良俱南攻下宛西入武關沛公
欲以兵二萬人擊秦峽下軍良說曰秦兵尚彊未可輕

臣聞其將屠者子賈豎易動以利願沛公且留壁使人先行為五萬人具食益為張旗幟諸山上為疑兵令酈食其持重寶啗秦將秦將果畔欲連和俱西襲咸陽沛公欲聽之良曰此獨其將欲叛耳恐士卒不從不從必危不如因其解擊之沛公乃引兵擊秦軍大破之遂北至藍田再戰秦兵竟敗遂至咸陽秦王子嬰降沛公沛公入秦宮宮室帷帳狗馬重寶婦女以千數意欲留居之樊噲諫沛公出舍沛公不聽良曰夫秦為無道故沛

公得至此夫為天下除殘賊宜縞素為資今始入秦即
安其樂此所謂助桀為虐且忠言逆耳利於行毒藥苦
口利於病願沛公聽樊噲言沛公乃還軍霸上項羽至
鴻門下欲擊沛公項伯乃夜馳入沛公軍私見張良欲
與俱去良曰臣為韓王送沛公今事有急亡去不義乃
具以語沛公沛公大驚曰為將奈何良曰沛公誠欲倍
項羽邪沛公曰輒生教我距關無內諸侯秦地可盡王
故聽之良曰沛公自度能却項羽乎沛公默然良久曰

固不能也今為奈何良乃固要項伯項伯見沛公沛公與飲為壽結賓婚合項伯具言沛公不敢倍項羽所以距關者備他盜也及見項羽後解語在項羽事中漢元年正月沛公為漢王王巴蜀漢王賜良金百鎰珠二斗良具以獻項伯漢王亦因令良厚遺項伯使請漢中地項王乃許之遂得漢中地漢王之國良送至褒中

枯地志云

褒谷在梁州褒城縣北五十里南中山昔秦欲伐蜀路無由入乃刻石為牛五頭置金於後偽言此牛能負金以遺蜀蜀侯貪信之乃令五丁共引牛斲山理谷致之成都秦遂尋道伐之因號曰石牛道蜀賦以石門在漢

中之西褒中之北是又云斜水源出褒城縣西北衙嶺
山與褒水同源而流北漢書溝洫志云褒水通沔斜水
通渭皆遣良歸韓良因說漢王曰王何不燒絕所過棧
以行船

道示天下無還心以固項王意乃使良還行燒絕棧道
良至韓韓王成以良從漢王故項王不遣成之國從與
俱東良說項王曰漢王燒絕棧道無還心矣乃以齊王
田榮反書告項王項王以此無西憂漢心而發兵北擊
齊項王竟不肯遣韓王乃以為侯又殺之彭城良亡閒
行歸漢王漢王亦已還定三秦矣復以良為成信侯從

東擊楚至彭城漢敗而還至下邑漢王下馬踞鞍而問曰
吾欲捐關以東等棄之誰可與共功者良進曰九江王黥
布楚梟將與項王有郤彭越與齊王田榮反梁地此兩人
可急使而漢王之將獨韓信可屬大事當一面即欲捐之
捐之此三人則楚可破也漢王乃遣隨何說九江王布而
使人連彭越及魏王豹反使韓信將兵擊之因舉燕代齊
趙然卒破楚者此三人力也張良多病未嘗特將也常為
畫策臣時時從漢王漢三年項羽急圍漢王滎陽漢王恐

憂與酈食其謀撓楚權食其曰昔湯伐桀封其後於杞
武王伐紂封其後於宋今秦失德棄義侵伐諸侯社稷
滅六國之後使無立錐之地陛下誠能復立六國後世畢
已受印此其君臣百姓必皆戴陛下之德莫不鄉風慕
義願為臣妾德義已行陛下南鄉稱霸楚必斂衽而朝
漢王曰善趣刻印先生因行佩之矣食其未行張良從
外來謁漢王方食曰子房前客有為我計撓楚權者具
以酈生語告於子房曰何如良曰誰為陛下畫此計者

陛下事去矣漢王曰何哉張良對曰臣請籍前箸為大王籌之曰昔者湯伐桀而封其後於杞者度能制桀之死命也今陛下能制項籍之死命乎曰未能也其不可一也武王伐紂封其後於宋者度能得紂之頭也今陛下能得項籍之頭乎曰未能也其不可二也武王入殷表商容之間釋箕子之拘封比干之墓今陛下能封聖人之墓表賢者之間式智者之門乎曰未能也其不可三也發鉅橋之粟散鹿臺之錢以賜貧窮今陛下能散

府庫以賜貧窮乎曰未能也其不可四矣殷事已畢偃
革為軒倒置干戈覆以虎皮以示天下不復用兵今陛
下能偃武行文不復用兵乎曰未能也其不可五矣休
馬華山之陽示以無所為今陛下能休馬無所用乎曰
未能也其不可六矣放牛桃林之陰以示不復輸積今
陛下能放牛不復輸積乎曰未能也其不可七矣且天
下游士離其親戚棄墳墓去故舊從陛下游者徒欲日
夜望咫尺之地今復六國立韓魏燕趙齊楚之後天下

游士各歸事其主從其親戚反其故舊墳墓陛下與誰
取天下乎其不可八矣且夫楚唯無彊六國立者復橈
而從之陛下馬得而臣之誠用客之謀陛下事去矣漢
王輟食吐哺罵曰豎儒幾敗而公事令趣銷印漢四年
韓信破齊而欲自立為齊王漢王怒張良說漢王漢王
使良授齊王信印語在淮陰事中其秋漢王追楚至陽
夏南戰不利而壁固陵諸侯期不至良說漢王漢王用
其計諸侯皆至語在項籍事中漢六年正月封功臣良

未嘗有戰鬪功高帝曰運籌策帷帳中決勝千里外子
房功也自擇齊三萬戶良曰始臣起下邳與上會留此
天以臣授陛下陛下用臣計幸而時中臣願封留足
矣不敢當三萬戶乃封張良為留侯與蕭何等俱封六
年上已封大功臣二十餘人其餘日夜爭功不決未得
行封上在雒陽南宮從復道望見諸將往往相與坐沙
中語上曰此何語留侯曰陛下不知乎此謀反耳上曰
天下屬安定何故反乎留侯曰陛下起布衣以此屬取

天下今陛下為天子而所封皆蕭曹故人所親愛而所誅者皆生平所讐怨今軍吏計功以天下不足偏封此屬畏陛下不能盡封恐又見疑平生過失及誅故即相聚謀反耳上乃憂曰為之奈何留侯曰上平生所憎羣臣所共知誰最甚者上曰雍齒與我故數嘗窘辱我我欲殺之為其功多故不忍留侯曰今急先封雍齒以示羣臣羣臣見雍齒封則人人自堅矣於是上乃置酒封雍齒為什方侯

括地志云雍齒城在益州什邡縣南四十里漢什邡縣漢初封雍齒為侯國

而急趣丞相御史定功行封羣臣罷酒皆喜曰雍齒尚
為侯我屬無患矣劉敬說高帝曰都關中上疑之左右
大臣皆山東人多勸上都雒陽雒陽東有城皋西有穀
颺倍河向伊雒其固亦足恃留侯曰雒陽維有此固其
中小不過數百里田地薄四面受敵此非用武之國也
夫關中左殽函殽三殽山也在洛州永寧縣西北二十
八里函谷關在陝州桃林縣西南十二
里右隴蜀龍山南連蜀之岨
山故云右隴蜀也沃野千里南有巴蜀之饒
北有胡苑之利博物志云北有胡苑之塞按上郡此地
之北與胡接可以牧養禽獸又多致胡

馬故謂胡苑之利也

阻三面而守獨以一面東制諸侯諸侯安定

河渭漕輓天下西給京師諸侯有變順流而下足以委輸此所謂金城千里天府之國也劉敬說是也於是高帝即日駕西都關中留侯從入關留侯性多病即道引不食穀杜門不出歲餘上欲廢太子立戚夫人子趙王如意大臣多諫爭未能得堅決者也呂后恐不知所為人或謂呂后曰留侯善畫計筴上信用之呂后乃使建成侯呂澤劫留侯曰君常為上謀臣今上欲易太子

君安得高枕而卧乎留侯曰始上數在困急之中幸用臣策今天下安定以愛欲易太子骨肉之間雖臣等百餘人何益呂澤彊要曰為我畫計留侯曰此難以口舌爭也顧上有不能致者天下有四人四人者年老矣皆以為上慢侮人故逃匿山中義不為漢臣然上高此四人今公誠能無愛金玉璧帛令太子為書卑辭安車因使辯士固請宜來來以為客時時從入朝令上見之則必異而問之問之上知此四人賢則一助也於是呂后

令呂澤使人奉太子書卑辭厚禮迎此四人四人至客建成侯所漢十一年黥布反上病欲使太子將往擊之四人相謂曰凡來者將以存太子太子將兵事危矣乃說建成侯曰太子將兵有功則位不益太子無功還則從此受禍矣且太子所與俱諸將皆嘗與上定天下梟將也今使太子將之此無異使羊將狼也皆不肯為盡力其無功必矣臣聞母愛者子抱今戚夫人日夜侍御趙王如意常抱居前上曰終不使不肖子居愛子之上

明乎其代太子位必矣君何不急請呂后承間為上泣
言黥布天下猛將也善用兵今諸將皆陛下故等夷乃
令太子將此屬無異使羊將狼莫肯為用且使布聞之
則鼓行而西耳上雖病彊載輜車卧而護之諸將不敢
不盡力上雖苦為妻子自彊於是呂澤立夜見呂后呂
后承間為上泣涕而言如四人意上曰吾惟豎子固不
足遣而公自行耳於是上自將兵而東羣臣居守皆送
至灞上留侯病自彊起至曲郵見上曰臣宜從病甚楚

人剽疾願上無與楚人爭鋒因說上曰令太子為將軍
監關中兵上曰子房雖病彊卧而傳太子是時叔孫通
為太傅留侯行少傅事漢十二年上從擊破布軍歸疾
益甚愈欲易太子留侯諫不聽因疾不視事叔孫太傅
稱說引古今以死爭太子上詳許之猶欲易之及燕置
酒太子侍四人從太子年皆八十有餘鬚眉皓白衣冠
甚偉上怪之問曰彼何為者四人前對各言名姓曰東
園公角里先生綺里季夏黃公上乃大驚曰吾求公數

歲公避逃我今公何自從吾兒游乎四人皆曰陛下輕
士善罵臣等義不受辱故恐而亡匿竊聞太子為人仁
孝恭敬愛士天下莫不延頸欲為太子死者故臣等來
耳上曰煩公幸卒調護太子四人為壽已畢趨去上目
送之召戚夫人指示四人者曰我欲易之彼四人輔之
羽翼已成難動矣呂后真而主矣戚夫人泣上曰為我
楚舞吾為若楚歌歌曰鴻鵠高飛一舉千里羽翮已就
橫絕四海橫絕四海當可奈何雖有矰繳尚安所施歌數闋戚夫

人噓唏流涕上起去罷酒竟不易太子者留侯本招此
四人之力也留侯從上擊代出奇計馬邑下及立蕭何相
國所與上從容言天下事甚衆非天下所以存亡故不
著留侯乃稱曰家世相韓及韓滅不愛萬金之資為韓
報讎彊秦天下振動今以三寸舌為帝者師封萬戶位
列侯此布衣之極於良足矣願棄人間事欲從赤松子
游耳乃學辟穀道引輕身會高帝崩呂后德留侯乃彊
食之曰人生一世間如白駒過隙何至自苦如此乎留

侯不得已彊聽而食後八年卒謚為文成侯子不疑代
侯子房始所見下邳圯上老父與太公書者後十三年
從高帝過濟北果見穀城山下黃石取而葆祠之留侯
死并葬黃石冢

括地志云漢張良墓在徐州沛縣東六十五里與留城相近也

每上冢

伏臘祠黃石留侯不疑孝文帝五年坐不敬國除

太史公曰學者多言無鬼神然言有物至如留侯所見
老父予書亦可怪矣高祖離困者數矣而留侯常有功
力焉豈可謂非天乎上曰夫運籌策帷帳之中決勝千

里外吾不如子房余以為其人計魁梧奇偉至見其圖
狀貌如婦人好女蓋孔子曰以貌取人失之子羽留侯
亦云

史記正義卷五十五

欽定四庫全書

史記正義卷五十六

唐 張守節 撰

陳丞相世家第二十六

史記五十六

陳丞相平者陽武戶牖鄉人也

陳留風俗傳云東昏縣衛地故陽武之戶牖鄉

也括地志云東昏故城在汴州陳留縣東北九十里

少時家貧好讀書有田三十

畝獨與兄伯居伯常耕田縱平使游學平為人長美色人或謂陳平曰貧何食而肥若是其嫂嫉平之不視家

生產曰亦食糠覈耳有叔如此不如無有伯聞之逐其婦而棄之及平長可娶妻富人莫肯與者貧者平亦恥之久之戶牖富人有張負張負女孫五嫁而夫輒死人莫敢娶平欲得之邑中有喪平貧侍喪以先往後罷為助張負既見之喪所獨視偉平平亦以故後去負隨平至其家家乃負郭窮巷以弊席為門然門外多有長者車轍張負歸謂其子仲曰吾欲以女孫子陳平張仲曰平貧不事事一縣中盡笑其所為獨奈何子女乎負曰

人固有好美如陳平而長貧賤者乎卒與女為平貧乃
假貨幣以聘予酒肉之資以內婦負誠其孫曰母以貧
故事人不謹事兄伯如事父事嫂如母平既娶張氏女
齎用益饒游道日廣里中社平為宰分肉食甚均父老
曰善陳孺子之為宰平曰嗟乎使平得宰天下亦如是
肉矣陳涉起而王陳使周市略定魏地立魏咎為魏王
與秦軍相攻於臨濟陳平固已前謝其兄伯從少年往
事魏王咎於臨濟魏王以為太僕說魏王不聽人或讒

之陳平亡去久之項羽略地至河上陳平往歸之從入破秦賜平爵卿項羽之東王彭城也漢王還定三秦而東殷王反楚項羽乃以平為信武君將魏王咎客在楚者以往擊降殷王而還項王使項悍拜平為都尉賜金二十溢居無何漢王攻下殷王項王怒將誅定殷者將吏陳平懼誅乃封其金與印使使歸項王而平身間行杖劒亡渡河船人見其美丈夫獨行疑其亡將要中當有金玉寶器目之欲殺平平恐乃解衣裸而佐刺船船

人知其無有乃止平遂至修武降漢因魏無知求見漢王漢王召入是時萬石君奮為漢王中涓受平謁入見平平等七人俱進賜食王曰罷就舍矣平曰臣為事來所言不可以過今日於是漢王與語而說之問曰子之居楚何官曰為都尉是日乃拜平為都尉使為叅乘典護軍諸將盡謹曰大王一日得楚之亡卒未知其高下而即與同載反使監護軍長者漢王聞之愈益幸平遂與東伐項王至彭城為楚所敗引而還收散兵至滎陽

以平為亞將屬於韓王信軍廣武絳侯灌嬰等咸讒陳
平曰平雖美丈夫如冠玉耳其中未必有也臣聞平居
家時盜其嫂事魏不容亡歸楚歸楚不中又亡歸漢今
日大王尊官之令護軍臣聞平受諸將金金多者得善
處金少者得惡處平反覆亂臣也願王察之漢王疑之
召讓魏無知無知曰臣所言者能也陛下所問者行也
今有尾生孝已之行而無益於勝負之數陛下何暇用
之乎楚漢相距臣進奇謀之士顧其計誠足以利國家

不耳且盜嫂受金又何足疑乎漢王召讓平曰先生事
魏不中遂事楚而去今又從吾游信者固多心乎平曰
臣事魏王魏王不能用臣說故去事項王項王不能信
人其所任愛非諸項即婁之昆弟雖有奇士不能用平
乃去楚聞漢王之能用人故歸大王臣躰身來不受金
無以為資誠臣計畫有可采者願大王用之使無可用
者金具在請封輸官得請骸骨漢王乃謝厚賜拜為護
軍中尉盡護諸將諸將乃不敢復言其後楚急攻絕漢

甬道圍漢王於滎陽城久之漢王患之請割滎陽以西
以和項王不聽漢王謂陳平曰天下紛紛何時定乎陳
平曰項王為人恭敬愛人士之廉節好禮者多歸之至
於行功爵邑重之士亦以此不附今大王慢而少禮士
廉節者不來然大王能饒人以爵邑士之頑鈍嗜利無
恥者亦多歸漢誠各去其兩短襲其兩長天下指麾則
定矣然大王恣侮人不能得廉節之士顧楚有可亂者
彼項王骨鯁之臣亞父鍾離昧龍且周殷之屬不過數

人耳大王誠能出捐數萬斤金行反間間其君臣以疑其心項王為人意忌信讒必內相誅漢因舉兵而攻之破楚必矣漢王以為然乃出黃金四萬斤與陳平恣所為不問其出入陳平既多以金縱反間於楚軍宣言諸將鍾離昧等為項王將功多矣然而終不得裂地而王欲與漢為一以滅項氏而分王其地項羽果意不信鍾離昧等項王既疑之使使至漢漢王為太牢具舉進見楚使即佯驚曰吾以為亞父使乃項王使復持去更以

惡草具進楚使楚使歸具以報項王項王果大疑亞父
亞父欲急攻下滎陽城項王不信不肯聽亞父聞項王
疑之乃怒曰天下事大定矣君王自為之願請骸骨歸
歸未至彭城疽發背而死陳平乃夜出女子二千人滎
陽城東門楚因擊之陳平乃與漢王從城西門夜出去
遂入關收散兵復東其明年淮陰侯破齊自立為齊王
使使言之漢王漢王大怒而罵陳平躡漢王漢王亦悟
乃厚遇齊使使張子房卒立信為齊王封平以戶牖鄉

用其奇計策卒滅楚常以護軍中尉從定燕王臧荼漢
六年人有上書告楚王韓信反高帝問諸將諸將曰亟
發兵坑豎子耳高帝默然問陳平平固辭謝曰諸將云
何上具告之陳平曰人之上書言信反有知之者乎曰
未有曰信知之乎曰不知陳平曰陛下精兵孰與楚上
曰不能過平曰陛下將用兵有能過韓信者乎上曰莫
及也平曰今兵不如楚精而將不能及而舉兵攻之是
趣之戰也竊為陛下危之上曰為之奈何平曰古者天

子巡狩會諸侯南方有雲夢陛下第出偽游雲夢會諸

侯於陳陳楚之西界

陳今陳州也韓信都彭城號楚王故陳州為楚西界也

信聞

天子以好出游其勢必無事而郊迎謁謁而陛下因禽之此特一力士之事耳高帝以為然乃發使告諸侯會陳吾將南游雲夢上因隨以行行未至陳楚王信果郊迎道中高帝豫具武士見信至即執縛之載後車信呼曰天下已定我固當烹高帝顧謂信曰若毋聲而反明矣武士反接之遂會諸侯于陳盡定楚地還至雒陽赦

信以為淮陰侯而與功臣剖符定封於是與平剖符世
世勿絕為戶牖侯平辭曰此非臣之功也上曰吾用先
生謀計戰勝克敵非功而何平曰非魏無知臣安得進
上曰若子可謂不背本矣乃復賞魏無知其明年以護
軍中尉從攻反者韓王信於代卒至平城為匈奴所圍
七日不得食高帝用陳平奇計使單于閼氏圍以得開
高帝既出其計祕世莫得聞高帝南過曲逆上其城望
見其屋室甚大曰壯哉縣吾行天下獨見洛陽與是耳

顧問御史曰曲逆戶口幾何對曰始秦時三萬餘戶間者兵數起多亡匿今見五千戶於是乃詔御史更以陳平為曲逆侯盡食之除前所食戶牖其後常以護軍中尉從攻陳豨及黥布凡六出奇計輒益邑凡六益封奇計或頗祕世莫能聞也高帝從破布軍還病創徐行至長安燕王盧綰反上使樊噲以相國將兵攻之既行人有短惡噲者高帝怒曰噲見吾病乃冀我死也用陳平謀而召絳侯周勃受詔牀下曰陳平亟馳傳載勃代噲

將平至軍中即斬噲頭二人既受詔馳傳未至軍行計之曰樊噲帝之故人也功多且又乃吕后弟吕須之夫有親且貴帝以忿怒故欲斬之則恐後悔寧囚而致上上自誅之未至軍為壇以節召樊噲噲受詔即反接轡檻車傳詣長安而令絳侯勃代將將兵定燕反縣平行聞高帝崩平恐吕太后及吕嬃讒怒乃馳傳先去逢使者詔平與灌嬰屯於滎陽平受詔立復馳至宮哭甚哀因奏事喪前吕太后哀之曰君勞出休矣平畏讒之就

因固請得宿衛中太后乃以為郎中令曰傳教孝惠是後呂嬖讒乃不得行樊噲至則赦復爵邑孝惠帝六年相國曹參卒以安國侯王陵為右丞相陳平為左丞相王陵者故沛人始為縣豪高祖微時兄事陵陵少文任氣好直言及高祖起沛入至咸陽陵亦自聚黨數千人居南陽不肯從沛公及漢王之還攻項籍陵乃以兵屬漢項羽取陵母置軍中陵使至則東鄉坐陵母欲以招陵陵母既私送使者泣曰為老妾語陵謹事漢王漢王

長者也無以老妾故持二心妾以死送使者遂伏劍而死項王怒烹陵母陵卒從漢王定天下以善雍齒雍齒高帝之仇而陵本無意從高帝以故晚封為安國侯安國侯既為右丞相二歲孝惠帝崩高后欲立諸呂為王問王陵王陵曰不可問陳平陳平曰可呂太后怒乃佯遷陵為帝太傅實不用陵陵怒謝疾免杜門竟不朝請七年而卒陵之免丞相呂太后乃徙平為右丞相以辟陽侯審食其為左丞相左丞相不治常給事於中食其亦沛

人漢王之敗彭城西楚取太上皇呂后為質食其以舍
人侍呂后其後從破項籍為侯幸於呂太后及為相居
中百官皆因決事呂頌常以前陳平為高帝謀執樊噲
數讒曰陳平為相非治事日飲醇酒戲婦女陳平聞曰
益甚呂太后聞之私獨喜面質呂頌於陳平曰鄙語曰
兒婦人口不可用顧君與我何如耳無畏呂頌之讒也
呂太后立諸呂為王陳平偽聽之及呂太后崩平與太
尉勃合謀卒誅諸呂立孝文皇帝陳平本謀也審食其

免相孝文帝立以為太尉勃親以兵誅呂氏功多陳平
欲讓勃尊位乃病謝孝文帝初立怪平病問之平曰高
祖時勃功不如臣平及誅諸呂臣功亦不如勃願以右
丞相讓勃於是孝文帝乃以絳侯勃為右丞相位次第
一平徙為左丞相位次第二賜平金千斤益封三千戶
居頃之孝文皇帝既益明習國家事朝而問右丞相勃
曰天下一歲決獄幾何勃謝曰不知問天下一歲錢穀
出入幾何勃又謝不知汗出沾背愧不能對於是上亦

問左丞相平平曰有主者上曰主者謂誰平曰陛下即問決獄責廷尉問錢穀責治粟內史上曰苟各有主者而君所主者何事也平謝曰主臣陛下不知其駕下使待罪宰相宰相者上佐天子理陰陽順四時下育萬物之宜外鎮撫四夷諸侯內親附百姓使卿大夫各得任其職焉孝文帝乃稱善右丞相大慙出而讓陳平曰君獨不素教我對陳平笑曰君居其位不知其任邪且陛下即問長安中盜賊數君欲彊對邪於是絳侯自知其

能不如平遠矣居頃之絳侯謝病請免相陳平專為一
丞相孝文帝二年丞相陳平卒諡為獻侯子共侯買代
侯二年卒子簡侯恢代侯二十三年卒子何代侯三十
三年何坐略人妻棄市國除始陳平曰我多陰謀是道
家之所禁吾世即廢亦已矣終不能復起以吾多陰禍
也然其後曾孫陳掌以衛氏親貴戚願得續封陳氏然
終不得

太史公曰陳丞相平少時本好黃帝老子之術方其割

肉俎上之時其意固已遠矣傾側擾攘楚魏之間卒歸
高帝常出奇計救紛糾之難振國家之患及呂后時事
多故矣然平竟自脫定宗廟以榮名終稱賢相豈不善
始善終哉非知謀孰能當此者乎